

# UTHM mampu bersaing di peringkat antarabangsa



**S**EMPENA majlis Konvokesyen Kelapan Universiti Tun Hussein Onn Malaysia (UTHM), saya ingin mengucapkan tahniah kepada 2,105 graduan yang berjaya membuktikan kepada semua bahawa keperitan dan kepahaman dalam menuntut ilmu itu akhirnya terbalas dengan kejayaan yang dikecapi pada hari ini.

Apa yang membezakan antara satu universiti dengan yang lain ialah fakultinya, tenaga pengajaranya dan pelajar masing-masing. Universiti memberi pengetahuan dan ilmu kepada pelajar bukannya kemahiran.

Universiti adalah tempat untuk pelajar menimba sebanyak mungkin ilmu dan pengetahuan. Pengetahuan dan ilmu yang diperoleh itu haruslah digunakan untuk memantapkan kemahiran berserta dengan sahsiah dan keperibadian mulia sebagai bekalan untuk berjaya dalam kehidupan di masa depan.

Setiap universiti adalah sama, yang membezakannya adalah kepakaran dalam bidang masing-masing. Dalam usaha untuk menjadi istimewa berbanding universiti lain di negara ini, saya berharap UTHM dapat menjana

kepakaran yang mereka ada untuk menjadi lebih daripada yang lain atau luar biasa.

Lantaran daripada aspirasi mewujudkan sebuah universiti bertaraf dunia dengan penanda aras universiti terkemuka antarabangsa, kita mesti ada asas yang kukuh dalam bidang penyelidikan dan inovasi.

Sebagai antara satu daripada 20 universiti awam negara, UTHM perlu menjalankan penyelidikan dan pembangunan dalam bidang yang lain dari lain. Hasil penyelidikan yang boleh dimanfaatkan pihak industri dan negara.

Bercakap mengenai persaingan, ia tidak dapat dielakkan begitu juga cabaran. Justeru kita perlu wujudkan strategi masing-masing untuk menjadi lebih daripada yang lain dalam semua aspek.

Dengan 33 program berdasarkan kejuruteraan dan teknikal, UTHM terus mengorak langkah dalam penetrakan bidang baru menerusi pelancaran program Sarjana Muda Aeronautik yang bakal menerima pelajar mulai tahun depan.

Peranan semua dalam usaha memantapkan lagi UTHM tidak boleh dipandang ringan. Dari

kemudahan fizikal terbaik yang disediakan, tenaga pengajar yang tidak jemu-jemu menabur bakti dan pelajar yang sentiasa dahagakan ilmu, pastinya UTHM mampu menjadi sebuah universiti awam yang cemerlang setanding dengan universiti dalam dan luar negara.

UTHM yakin dengan bimbingan dan tunjuk ajar daripada Canselor UTHM, Tunku Mahkota Johor, Tunku Ibrahim Ismail Sultan Iskandar, universiti ini akan menjadi lebih dinamik dan mampu bersaing di peringkat antarabangsa.

Akhir kata, berjayanya graduan semua pada hari ini hanyalah satu permulaan untuk satu perjalanan kehidupan yang lebih panjang dan berliku.

Kami di UTHM mencorak anda sebagai mana indah yang kami mampu, maka jadilah insan yang sentiasa menjunjung keunggulan ilmu di bahu kiri dan kanan sebagai mana anda semua menggalas tanggungjawab besar sebagai graduan UTHM yang cemerlang, berpengetahuan, berkemahiran, memiliki sahsiah serta keperibadian tinggi.